



COMUNICADO DI PRENSA

Fecha: 24 di september 2009

No.: 18-2009

Oranjestad - Comision Bon Boluntad (CBB) a analisa e kehonan cu ciudadano y instancia a deposita cerca CBB den e periodo cu a transcuri desde cu a inicia su trabao den e actual campaña electoral te cu e ultimo siman aki. Den e recado di prensa aki CBB ta duna un relato tocante esakinan y un comentario unda esaki ta al caso.

Keho riba material di propaganda

CBB a haya un cantidad di keho riba ponemento di material di propaganda manera bandera y borchu riba lugar no apropiada, manera tereno publico. Tambe keho riba kitamento o hortamento di bandera di parti di contrincante politico y intimidacion relaciona cu ponemento di borchu.

CBB a denuncia e hechonan aki repetidamente y a urgi tambe Direccion di Obra Publico (DOW) pa tuma medida pa kita material di propaganda for di propiedad publico. Te awor esaki no a resulta den mucho actividad di e departamento aki, aunke director di e servicio publico a anuncia cu accion lo ser tuma.

E hecho mas grave den e categoria aki tabata kimamento di un trailer cu molotov cocktail cu un candidato tabata usa pa su campaña.

Actividad politico riba caminda publico

Hopi keho CBB a ricibi en cuanto e forma con partidonan politico ta tuma caminda publico den nan poder, den cierto caso hasta rotonde completo y sin permiso pa esaki, pa parti material di propaganda manera sticker. E actividadnan aki principalmente den fin di siman a bira un estorbo grandi pa e ciudadano cu kier usa caminda publico simplemente pa e yega otro lugar. Ademá e obstaculacion di trafico aki ta haci cu hopi ciudadano ta sinti nan mes presiona pa duna cara mientras nan no kier. No ta nada agradable ora bo ta ser obliga pa bisa si o no pa acepta o nenga material di propaganda, mientras den hopi caso ta trata di persona cu no ta anonimo den comunidad, y no gusta di keda marca pasobra nan ta acepta o nenga material di propaganda.

Keho tocante medio di comunicacion

CBB a ricibi diferente keho tocante varios aspecto den transmision di radio y television, di cual nos ta menciona algun di importancia:

- Uso di material audiovisual cu ta propiedad intelectual di otro sin permiso;
- Kimamento di bandera di Aruba den un spot di tv, alegando cu e contrincante politico ta haci esey;
- Calificacion di contrincante politico den terminonan inaceptable den un corant; e medio aki no a firma convenio cu CBB;
- Insinuacion tocante orientacion sexual y vida priva di un mandatario; pa CBB no tin absolutamente ningun motibo pa esaki ta topico den campaña electoral y e ta toca derecho fundamental constitucional di un persona y tambe ta un violacion serio di

Secretariado di Comision di Bon Boluntad :

Tel. 582-1120 Ext. 34/41-Fax. 588-3200

E-mail secretariat@arubachamber.com

Website: www.arubachamber.com/ComisionBonBoluntad.htm



reglanan general di etica periodistico. Ta trata di un medio cu no a firma convenio cu CBB;

- Acusacion di a ricibi placa di gobierno pa cierto servicio (huur di edificio) mientras cu segun denunciante esaki no ta verdad.

Den e casonan menciona, CBB a haya denuncia pero naturalmente no semper ta dispone di e informacion pa deduci si e keho ta basa riba verdad o no. Den cierto caso, e denunciante por o ta haciendo tramite caba pa atende su derechonan via corte.

Den su informe despues di eleccion, CBB lo duna un relato mas extenso di loke a observa y a ricibi como keho den henter e campaña y lo duna tambe sugerencia pa mehoracion.

Atentamente,

Na nomber di Comision Bon Boluntad,

Lydia Emerencia, Presidente

Secretariado di Comision di Bon Boluntad :
Tel. 582-1120 Ext. 34/41-Fax. 588-3200
E-mail secretariat@arubachamber.com

Website: www.arubachamber.com/ComisionBonBoluntad.htm